

Á Mesa do Parlamento

Noela Blanco Rodríguez e Julio Torrado Quintela, deputada e deputado pertencentes ao **Grupo Parlamentario dos Socialistas de Galicia**, ao abeiro do disposto no artigo 152 do Regulamento da Cámara, presentan ante esa Mesa a seguinte **pregunta** para a súa resposta **por escrito**.

Toda a lexislación tanto a nivel estatal como a autonómica establece a primacía das medidas de alternativa familiar para todas aquelas persoas menores que se atopan en situación de desprotección.

A nivel estatal, a actual *Lei 26/2015, do 28 de xullo, de modificación do sistema de protección á infancia e á adolescencia*, establece que nas actuacións de protección dos menores deben primar as medidas familiares fronte ás residenciais, as estables fronte ás temporais, e as consensuadas fronte ás impostas. Igualmente establece no artigo 21.3 que “co fin de favorecer que a vida do ou da menor desenvólvese nunha contorna familiar, prevalecerá a medida de acollemento familiar sobre a de acollemento residencial para calquera menor, especialmente para menores de seis anos.

Non se acordará o acollemento residencial para menores de tres anos salvo en supostos de imposibilidade, debidamente acreditada, de adoptar nese momento a medida de acollemento familiar ou cando esta medida non conveña ao interese superior do ou da menor. Esta limitación para acordar o acollemento residencial aplicarase tamén aos e ás menores de seis anos no prazo máis breve posible. En todo caso, e con carácter xeral, o acollemento residencial destes ou destas menores non terá unha duración superior a tres meses”. Así mesmo, o *Código Civil, no artigo 173 bis*, tras a modificación realizada pola mencionada lei, redefine as modalidades de acollemento familiar en función da súa duración e obxectivos.

Na nosa comunidade, con arranxo ao disposto nos *artigos 15.1 e 16.2 da Lei 2/2006, do 14 de xuño, de dereito civil de Galicia*, e en aplicación dos principios reitores da actuación dos poderes públicos no exercicio das funcións de atención e protección á infancia e a adolescencia, para a adopción da medida de acollemento especifícase que se dará prioridade á utilización do acollemento familiar sobre o residencial.

Grupo Parlamentario

No que atinxe aos acollementos familiares, de xeito adicional á normativa vixente, a Consellería de Política Social está a aplicar a *Circular nº 5/2010, de data 25 de xuño de 2010*, e a *Instrución do 8 de marzo de 2012, sobre o pago dos acollementos familiares*.

Existe unha diferenza na retribución dos acollementos en función de se é realizado pola familia extensa ou é un acollemento en familia allea, supoñendo isto unha clara discriminación da familia extensa con referencia a outros tipos de acollementos.

A compensación económica que se abona ás familias acolledoras é de 600 euros/mes por cada menor acollido menor dun ano, 400 euros/mes por cada menor entre 1 e 3 anos, e de 240 euros/mes por menor entre 4 e 18 anos. No caso de familia extensa, estas cantidades se modulan en función dos ingresos da familia acolledora e do número de menores acollidos. A administración, para determinar se unha familia extensa ten ou non dereito á remuneración ten en conta o número de menores a acoller.

É dicir, o límite de ingresos aplícase progresivamente en función dos menores que pasan a formar parte da unidade familiar. Así, é posible que unha familia non teña dereito a unha remuneración se acolle a un só menor, pero si se acolle ao segundo. Hai ademais unha incompatibilidade entre as distintas axudas que perciben, como por exemplo, as pensións non contributivas.

Por outra banda, respecto dos gastos puntuais, a *Circular 1/2013, do 21 de maio de 2013* regula o procedemento para a solicitude e xustificación de cobertura daqueles gastos, derivados da atención de menores que están baixo o sistema público de protección, que excedan dos deberes que corresponden aos titulares da garda dos ou das menores e non estean cubertos por outro programa ou sistema público. No apartado 3 desta circular establécense como beneficiarios/as destes posibles gastos extraordinarios as e os menores tutelados en acollemento familiar, en familia extensa ou allea. A pesares do cal as familias acolledoras seguen sen poder dispor en todo momento de axudas da administración para poder facer fronte a determinados gastos que non están cubertos: gastos odontolóxicos ou oftalmolóxicos, desprazamentos regulares a puntos de encontro para realizar visitas cos proxenitores, clases de reforzo en

nenos/nenas con problemas de aprendizaxe, excursións ou viaxes de fin de curso de certa contía ...

Os puntos de encontro familiar son sete para toda a comunidade galega, claramente insuficientes se temos en conta que se dan casos nos que as familias teñen que percorrer longas distancias cos menores, o que implica que os nenos e nenas perdan horas lectivas e teñan problemas para realizar as tarefas escolares, engadindo ademais a carga emocional e o cansazo, o que lles chega a supoñer trastornos do sono.

Hai que recordar que as e os menores en acollemento permanente teñen a consideración de fillos, para os efectos de recoñecer a condición de familia numerosa, e por tanto, aplícanlles os beneficios establecidos para as devanditas familias no ámbito da Comunidade Autónoma de Galicia; as familias que acollen menores en situación de tutela ou garda gozan de exención total de pago por acceso ás escolas infantís 0-3 dependentes da Administración autonómica. Ademais, teñen a posibilidade de acceder a unha praza nas devanditas escolas en calquera momento do curso, se o acollemento fose iniciado con posterioridade ao peche do prazo de solicitude; son usuarias ou usuarios gratuítos dos comedores escolares dependentes da consellería con competencias en materia de educación, mentres cursen o ensino básico e o segundo ciclo de educación infantil, sen embargo se por zona lles corresponde un centro concertado, os servizos de comedor deben ser abonados polas familias.

Ademais, estanse producindo casos nos que os criterios dos técnicos e técnicas de menores difiren non só dunha provincia a outra, senón que entre os diferentes equipos da mesma provincia levan a cabo actuacións e consideracións diferentes, o que leva a unha distorsión das normas e unha indefensión por parte das familias

Por todo o exposto, a deputada e o deputado que asinan formulan as seguintes preguntas para a súa resposta escrita:

1. Ten previsto a Xunta de Galicia mudar os criterios establecidos nas circulares da Consellería de Política Social, para que nos casos de acollementos de menores as prestacións económicas non dependan das rendas familiares nin de se existen ou non vínculos de

- parentesco entre os/as acolletores e os/as menores?
2. En caso afirmativo, cando ten previsto levar a cabo estes cambios?
 3. Que xestións levou a cabo o Goberno galego co de España para deixar de descontar das pensións non contributivas a contía por menor acollido en familia extensa?
 4. Estanse abonando en todos os casos nos que as familias en acollemento extenso o solicitan e xustifican convenientemente, os gastos extraordinarios puntuais dos menores en familias de acollemento cuxo procedemento para a solicitude e xustificación de cobertura aparecen regulados na *Circular 1/2013, do 21 de maio de 2013*?
 5. En caso negativo, cales son os motivos de que non se estean abonando todos os gastos extraordinarios das ou dos menores acollidos en familia extensa?
 6. Ten previsto o Goberno galego incrementar durante o ano 2017 os puntos de encontro familiar?
 7. Nos casos puntuais nos que ás e aos menores en acollida se lles asigne un centro escolar concertado, ten previsto a Xunta de Galicia abonar os gastos do servizo de comedor?
 8. Coñece o Goberno galego a existencia de casos nos que os diferentes criterios dos técnicos e técnicas de menores en acollemento, provoque que para un mesmo caso se estean poñendo en marcha actuacións diferentes?
 9. En caso afirmativo, que medidas vai a poñer en marcha o Goberno galego para unificar os criterios técnicos?

Pazo do Parlamento, 6 de abril de 2017

Asdo.: Noela Blanco Rodríguez

Julio Torrado Quintela

Deputada e deputado do G.P. dos Socialistas de Galicia

Asinado dixitalmente por:

Noela Blanco Rodríguez na data 10/04/2017 13:21:11



PARLAMENTO DE GALICIA
REXISTRO XERAL ENTRADA
Data asento: 10/04/2017 13:23
Nº Rexistro: 7844
Data envío: 10/04/2017 13:23:26.689



 **Grupo Parlamentario**

Julio Torrado Quintela na data 10/04/2017 13:21:16

Partido dos
Socialistas
de Galicia